



屋簷鳥

「禾鵲仔」又安做「屋簷鳥」，華語係「麻雀」，這種鳥仔聰明又蓋搞怪，最輒聚集在莊下有好庇雨又有好搞寮个所在，逐日打早打暗會在屋簷脣唱歌仔比賽，企在電線頂高又乜啦歌哩曲，有時俚等毋堵好對電線底下行啊過，還會畀賞臭嘵嘵个屎尿。

頭擺田坵仔蒔禾个時節，禾串開始灌漿轉勾後，會飼禾鵲仔來拈攏，耕田人在田坵仔做稈人仔嚇鳥仔無效，禾鵲仔還會在稈人仔頭那頂屙屎。有時打紙炮來逐鳥仔，幾分鐘後又乜倒轉來，還會唱山歌打採茶嘍嘍啾啾講：「俚又來叻！」。用空罐頭罐仔牽索仔搖到玲玲琅琅鳥仔會驚，無搖時又倒轉來食穀串。

老屋係四合院拿瓦个平屋，蓋久無人歇了，飼來弛崗打陣个禾鵲仔在桁桷頂跳上跌落，每日俚都會歸老屋看看哪，順續去廳下祖公神位前唱喏。有一日廳下門添放核關，禾鵲大軍攻入去，在燈樑頂高屙啊蓋多鳥屎，連子孫燈項乜啣來蓋多稈坵，想在燈樑頂高作寶。最得人惱个就係連祖公牌又乜毋放過，搞到一哪仔屙屙糟糟，還會在神茶杯項食水，將神茶盪淨淨。下後請做鋁門个師父來安活動紗門，禁止禾鵲仔飛入廳下仔。

無想著佢等嘎徙陣地，全部飛在簷頭頂同桁桷項，嘍嘍啾啾緊唱歌仔，歸個大步簷屙到一天一地都係鳥屎，落腳毋得。還會啣草屑同鳥毛來作寶，還將樹桁仔啄到全全坑。俚去五金行買一領鳥網，掛在三間正身間个簷頭頂高，鬼精靈个屋簷鳥一隻都網毋著，繼續在網脣唱山歌，瓦面頂高密麻麻个屋簷鳥向俚緊唱：「網俚毋著！網俚毋著！比你過精！比你過精！」

今年氣候改常，盡久無落雨叻，青天合个日頭晒到 36 度以上个氣溫，一哪都燥絲絲仔，果園肚个抽水馬達抽毋多出，水細管蔭田坵水毋多會行，改牽「噴鳥」用噴水蔭果樹，馬達抽三英吋个水只能蔭兩分田，一點鐘後再徙位。田坵肚人造雨，分果樹嚙到樹根緊動，微風帶動樹葉向俚緊頷頭講多謝，田坵無水植物就無戲做。園肚个細紅毛泥路項水花連天，果園肚像落大雨共樣，有百過隻个禾鵲仔弛崗打陣飛來搞水，翼閉閉仔沖水洗身仔，飛上飛下還會互相潑水，一對一打水戰，還會摘腰絞仔。佢等搞到翻車舂斗，俚在邊脣看著緊嘵。

有屋簷鳥个屋仔加蓋鬧熱，毋過犯人个時節真想一網打盡，正式係使人又愛又恨个鳥精仔。

作者：謝惠如

☆詞彙學習☆

【灌漿】gon jiongˊ：穀粒逐漸飽滿。

【噴鳥】pun jiauˋ：360 度旋轉的噴水頭。

【一天一地】idˋ tienˊ idˋ ti：到處都是。

【犯人】famˊ nginˋ：搗蛋、侵擾別人。